



*Sabtu, 22 Juli 2023*

**Ogen: Amos 2: 4-5**



**Nulak Pengajaren**



**P**engajaran e me proses, cara, perbahanen guna mereken petunjuk gelah ieteh ras ipahami. Dasar pengajaran i bas bangsa Juda e me Kata Dibata si nggo termaktub i bas undang-undang nta hukum Taurat. Ope lenga bangsa Juda ras bangsa Israel pecah, sada me sumber pengajaran e e me Taurat. Tapi megati ka nge labo ipahami ras idalanken, apai ka nggo pecah jadi dua. Bangsa Israel megati nggo ngikutken ajaren bangsa si deban ras nadingken undang-undang Tuhan. Bangsa Juda pe mawen-mawen bage. Adi rembanglah rajana erkemalangen man Tuhan, maka kerina ia ngikutken undang-undang Tuhan e, adi lang ikutkenna ka nge ajaran bangsa si deban.

I bas bahan renungenta sendah i ja teridah rawa Dibata nandangi bangsa Juda. I ja bangsa Juda la erngadi-ngadi erbahan dosa janah itulakna pengajaran Dibata si nggo ndekah seh man bana janah jadi petunjuk i bas kegeluhenna. Padahal ibereken Dibata dasar pengajaran e guna kiniulin bangsa Juda segelah tetap erdalan i bas dalan Dibata ras si ngena ateNa. Tupung idalankenna persuruhan Tuhan, bangsa Juda mejuah-juah. Tapi tupung itulakna, bangsa e ngenanami kiniseran iteruh ukumen Dibata. Intina nulak pengajaran dibata la maba kejuah-juahen.

Adi sipahami maka pengajaran si ibereken Dibata e si tuhuna mereken sada kiniulin i bas geluhta gelah ula kita bene ras ndabuh ku bas dosa. Tapi megati pengajaran Tuhan e erbansa kita bagi si terpenjara, la bebas piahna rusur si rintaken i bas pusuhta antara ndalanken sura-sura Tuhan ras sura-sura doni enda. Tapi kai pe ningen arah Kata Dibata e si tuhuna Dibata ndidik ras ngajar kita la ngulangi pengalamen kalak Juda si erdosa man Dibata. Sura-suraNa arah pengajaran e kita tetap nggeluh ngikutken undang-undangNa.

*Kesulitan kita yang paling besar Ketika membaca Alkitab, bukan memahaminya tetapi melaksanakannya (Eka Darmaputra).*